



**Uunga siunnersuut Meeqqat tapersorsorneqartarnerat pillugu Inatsisartut inatsisaani inatsisip allanngortinneqarnissaa pillugu inatsisissatut siunnersuut (Meeqqanut aamma ilaqutariit illuini ataatsimoorussamik digitalikkut sullissinermi isumaginninnermut Aqutsisoqarfimmiit ersarissaaneq il. il.)**

(Meeqqanut, Inuusuttunut Ilaqutariinnullu Naalakkersuisoq)  
(Siullermeerneqarnera)

Demokraatit iluarisimaarpat, Naalakkersuisut allannguutissatut siunnersuut naleqquttoq saqqummiummassuk, qulakkeereqataasusaaq, meeqqat sumiginnakkat eqqortumik taperserneqarlutillu ikiorneqarnissaannut. Siunnersuutittaaq siunertaraa meeqqat inatsisitigut isumannaassusaat pitsanngorsarneqassasut.

Taakkulu saniatigut nuannaarutigaarput, kommunit siunnersuuteqarnikkut IT-systemimut ataatsimoorussamut ilanngunnissaminut pisussaaffilerneqassammata, taamaalillutik meeqqanut tunngasut suliarisarneri digitalimik ingerlanneqartalissallutik. Tamanna iluarisimaarnarpoq aammalu neriuutiginarluni kommuninut meeqqanut tunngasunik suliat kisitsisillu nassiussuunnissaat oqinnerulersissagaa.

Siunnersuutip suliarineqarneranut atasumik maannakkut katersuunnermi nammineerlunga misigisimavara, qanoq ajornakusoortigisoq meeqqat angerlarsimaffiup avataanut inissinneqarsimasut pillugit kisitsisinik nutaanik pissarsiniarneq. Pitsaassagaluarpoq, siunissami tassunga pitsaanagerusunik aaqqiisoqaraluarpat. Pingaartuuvormi tatiginartunik nutartikkanillu paasissutissanik peqarnissaq kommunini ulluinnarni aqutsinermi, aammalu aalajangiisoqassatillugu siunissamut ungasinnerusumut tunngassuteqartunik.

Aammattaarli naatsumik maluginiagaqarpunga, ajoraluartumik ilanngunneqarsimanngitsumik. Demokraatit pingaartumillu Inatsisartunut ilaasortaq Nivi Olsen sivisuumik sorsussimavoq, illoqarfimmi ilaqutariinnut tapersersortinik eqqussisoqarnissaanik. Tamanna ilaqutariit siunnersorniarlugit tapersersorniarlugillu unammilligassaasa qaangerniarnissaannut, ataatsimuuginnarnissaannut aammalu ingerlalluarnissaannut. Tamanna iluaqutaallunilu nuannaarutaassagaluarpoq ilaqutariinnut namminermut aammalu inuiaqatigiitsinnut. Ilaqutariit nukittuut ingerlalluuartullu inuiaqatigiitsinni qarmaliussat siullersarissavaat.

Demokraatini isumaqarpugut, ilaqutariinnut tapersersortimik isumassarsiaq pitsaasuusoq. Eqqarsaatigerusunnarpoq, suliat allaaneruumik suliarisariaqaraluarnerigut ilaqutariit- peeqqallu iluanni, taamaattumillu ataatsimiititaliaq kajumissaarusupparput oqallisigeqqullugu, ilumut ajunnginnerusinnaanersoq illoqarfinni ilaqutariinnut tapersersorteqarnissamik periarfissiisoqarpat allannguutinut allanut ilanngullugu, uani Naalakkersuisunit siunnersuutigineqartunut.

Siunnersuut taamatut oqaaseqaatitalerlugu Ilaqutariinnermut- aamma Peqqissutsimullu ataatsimiititaliami suliareqqinneqartussatut innersuussutigaarput.